

佛說普門品經

八十六  
服二

47637



元祿九年丙子二月日重脩

皇圖鞏固 帝階綴昌

佛日增輝 懋輪常轉

山城州天安寺法金剛院置





佛說普門品經

西晉太康年竺法護譯

服

聞如是一時佛遊王舍城靈鷲山與大比丘  
衆比丘八百菩薩四万二千得諸揔持神通  
已達聖智弘暢辯才無礙三昧已定無所不  
博時有菩薩名離垢藏與九万二千菩薩從  
普華如來國其世界名淨行遊詣忍界靈鷲  
山卅尊遙見離垢藏菩薩與無數千大士眷  
屬圍遶遊步虛空佛心念曰斯離垢藏間別  
由路遠步諸國宣普華如來至真等正覺命  
來受普門品今當聚會諸菩薩衆于時大聖  
即如其像顯揚言教示現感應今無央數無



限世界諸菩薩衆尋時悉來至斯忍土詣靈鷲山行到佛所稽首足下却住一面靈鷲山中諸菩薩衆閑居宴者悉來集會禮畢却坐離垢藏菩薩應時化作七寶蓮華其葉有千持詣能仁如來至真等正覺稽首奉上啓曰普華如來至真等正覺淨行世界聖尊敬問無量遊步康強力勢輕履起居安隱多所救濟今見遣來宣承敬詣啓受普門不可思議清淨之品爲開士說時離垢藏菩薩大士問訊問訊畢退在虛空結跏趺坐與諸開士坐寶蓮華介時溥首童真於會中起更整衣服偏袒右肩長跪叉手而白佛言善哉世尊願

說普門不可思議道品法源爲諸菩薩分別  
演之憶念往古過去久遠世時從普門如來  
至真正覺聞斯經典興立八十四万百千億  
姪三昧久逮七十七億百千諸姪揔持門行  
唯願世尊愍諸菩薩重宣揚之佛告溥首童  
真諦聽善思念之答曰唯然世尊願樂欲聞  
溥首與諸菩薩受教而聽佛告溥首若有菩  
薩欲學普門所入之法等意分別遊入於色  
等意分別遊入音聲等意分別遊入臭香等  
意分別遊入衆味等意分別遊入細滑等意  
分別遊入心性等意分別遊入女人等意分  
別遊入男子等意分別遊入童女等意分別



遊入童子等意分別遊入諸天等意分別遊  
入諸龍等意分別遊入鬼神等意分別遊捷  
沓和等意分別遊阿須倫等意分別遊迦樓  
羅等意分別遊真陀羅等意分別遊摩休勒  
等意分別遊入地獄等意分別遊入餓鬼等  
意分別遊入畜生等意分別遊入貪婬等意  
分別遊入瞋怒等意分別遊入愚癡等意分  
別遊諸不善等意分別遊諸德本等意分別  
遊諸有爲等意分別遊諸無爲等意分別溥  
首諸開士所可周遊一切悉備遊居平等具  
足至道是爲學入普門定法佛告溥首童真  
何謂菩薩等意分別遊入於色曉了解色如

水之沫而不可得不可護持無有堅固則爲  
等意觀無有色是謂菩薩等遊於色又告溥  
首何謂菩薩等意分別遊入音聲如人呼聲  
而有響應尋即消滅則無形像不知所生一  
切無有若干之事而無差特亦無有相已了  
無相人所言者虛無無實已曉諸音深山響  
報則乃等觀是爲等觀遊入諸音聲又告溥  
首何謂菩薩等意分別遊入臭香周遊往返  
百億劫數鼻之所嗅而無有馱如大海淵無  
有充滿其香之像而不可獲爲虛偽法無有  
真諦設求審誠無合會處斯無所有而不可持  
鼻處無實恍惚若空如幻士化假使分明



則無等觀遊入麁香又告溥首何謂菩薩等  
意分別遊入衆味至於喉咽不知鹹味亦無  
不味從因緣別其舌所甘猶緣會合曉覺無  
念則爲等觀遊入衆味又告溥首何謂菩薩  
等意分別遊入細滑其細滑者志有所存緣  
求服之其柔軟者而不可得已覩斯緣細滑  
鞞鞞無所適任計于細滑則無有我亦無所  
有所依因著被服乃有所倚斯爲等觀遊入  
細滑又告溥首何謂菩薩等意分別遊入心  
法假三界人悉今集會立在一處使求執心  
莫知所在不見形像亦無猶豫亦無合散不  
知所住現若干色於內無處處無有住如幻



士化虛而不實則為等觀遊入心法又告溥  
首何謂菩薩等意分別遊入女人察于四大  
則無女人識癡惑者迷於愛欲荒于虛無計  
女人者猶如幻士化現女像因彼所行從其  
所樂女人如幻起色欲意彼無有女癡者惑  
之能別如斯諸女無相解脫平等而現女色  
則為等觀遊入女人又告溥首何謂菩薩等  
意分別遊入男子如今男子等自發意吾為  
雄夫興念斯為女人欲心無色無實可獲不  
見女像等惟諸色發起女想設所思想斯男  
斯女等如野馬水月則無男女了男無形虛  
偽而立已能平等則能現女則為等觀遊入

男子又告溥首何謂菩薩等意分別遊入童  
男若如樹木設無有芽則無根莖設無根莖  
則無華實設無女人則無童子緣号童子想  
於無知覺女無生不有子性解一切無則為  
等觀遊入童子又告溥首何謂菩薩等意分  
別遊入童女如便拔樹根終不生其明智者  
不於求果醜達別誼曉發一切勇猛無想枯  
竭衆流斯為童女了女如此所現平等則為  
等觀遊入童女又告溥首何謂菩薩等意分  
別遊入諸天諸天嚴淨功德自然其意鮮潔  
宮殿綺飾無造立者心樹妙華無下種者福  
荼幻化生無思議淨允流離滅度淨了天虛



僞成立恍惚勝說平等現諸天像是爲菩薩  
遊入諸天又告溥首何謂菩薩等意分別遊  
入諸龍見無求生興雲七日雨所霑潤不在  
內外遍閻浮提漸歸大海所滿水所由來衆  
生如是學若干緣現種種罪福自然衆生無  
所有愚冥之人以虛爲實覩龍平等是爲菩  
薩等遊諸龍又告溥首何謂菩薩等意分別  
遊入鬼神心如門開與色有像其身高大心  
爲一類心不可畏難因會有恐懼見法無有  
實衆想不可議無實爲空說平等寂而現鬼  
像是爲菩薩等遊鬼神又告溥首何謂菩薩  
等意分別遊入捷沓和其法無往而音說往

曉無往來等說捷沓和是爲菩薩等觀遊入  
捷沓和又告溥首何謂菩薩等意分別遊入  
阿湏倫不以事因阿湏倫心等無起無滅無  
生而現平等是爲菩薩等觀遊入於阿湏倫  
又告溥首何謂菩薩等意分別遊入迦留羅  
造受無受立辭名号設無名色等觀迦留羅  
是爲菩薩遊入迦留羅又告溥首何謂菩薩  
等意分別遊入真陀羅法無作而作則立真  
陀羅分別無所生平等真陀羅是爲菩薩等  
觀遊入於真陀羅又告溥首何謂菩薩等意  
分別遊入摩休勒其法所名立若干人法無  
有所相爲虛分別諸想無想自然說平等音



現摩休勒是為菩薩等觀遊入於摩休勒又  
告溥首何謂菩薩等意分別遊入地獄地獄  
無主空無造者從已想想無興所有地獄清  
淨鮮潔無垢智覺如幻本無所有無相無相  
無所有別如虛空平等寂然而現地獄是為  
菩薩等遊地獄又告溥首何謂菩薩等意分  
別遊入餓鬼餓鬼無形無名本無處所因慳  
致之慳無所任不解所有計吾我人知悉無  
本了無餓鬼是為菩薩等遊餓鬼又告溥首  
何謂菩薩等意分別遊入畜生如雲霧像現  
若干色彼則無貌悉無所有心思虛無等如  
陰霧種種色像畜生志性罪福如幻迷惑虛

妄而說畜形等說寂聲是為菩薩等遊畜生  
又告溥首何謂菩薩等意分別遊入貪婬欲  
從想起所想無有無實無像無貌無住處不  
可得貪婬如空愚癡顛倒思想塵勞法無塵  
垢欲虛如空至於十方求不可見貪婬無形  
愚冥貪懼不得安隱無難懷懼辟如丈夫無  
獲懷懼怖捨馳走得無見空一切皆空彼無  
解脫愚癡顛倒反造逆想闇冥不解法如虛  
空去來今佛解諸貪欲貪欲無脫愛想悉空  
其譏貪婬則求脫欲斯皆無本本自然淨見  
佛道場平等無想觀衆如者彼慕離欲所想  
虛危乃離諸想如所發念僥脫貪婬謂當度



欲想無所求不壞本際貪欲無思本淨如斯  
則不想脫假令度欲則謂為淨貪欲空無計  
此無二愚冥相二行者深觀如幻是則失句  
發諸想念貪欲無起假号愛欲無染者名諸  
名無礙知欲無得觀真究空不懷貪欲不知  
見脫貪欲佛法等如泥洹解貪欲陰等離吾  
我知貪欲寂等御憺怕平等欲陰見如幻化  
是為菩薩等遊貪婬又告溥首何謂菩薩等  
意分別遊入瞋恚從對起因緣生對無我  
号我立無量事如樹木生結恨急毒聲自然  
空無想無有如閑居樹相指火然因緣離散  
火滅不現虛無起身鹿聲亦尔因欲稱量則

不興恚不從聲起不虛內身亦不外來所由  
因空從他緣起因對而立各各分別則無瞋  
恚如風種過有恨為慢若知方便因想立緣  
穢聲如是恚因空生恚還自燒而危其身別  
瞋怒想竟無形像平等察聲聽瞋怒音恨本  
際等無本無持分別法界則觀平等是為菩  
薩等遊瞋怒又告溥首何謂菩薩等意分別  
遊入愚癡愚從無起察癡無有設無所有狂  
無狂冥人無蔽願無礙求空方面造愚為虛  
愚癡人所行最行難獲諸法無明因想為塵  
辟如丈夫欲度虛空億劫不得知空本末愚  
亦如是本際無愚議蔽冥不生塵無所成滿



如度虛空不知方面亦無具足無能步度如百  
千劫習樂闇蔽彼無厭足不以飽滿譬如童  
子吹氣滿胞旋解口察無所有罪福如空胞  
而習於愚求不可得懷來欲謂愚無底斷根  
無形無根無住故不可盡設愚難盡斯不可  
得猶是衆生如幻不賜設有造喻三界生類  
日度一切令得涖洹佛壽住世億劫難計濟  
脫黎庶人不可盡因愚立種人界無想癡冥  
如幻是不可得佛與愚等觀斯無二設能等  
觀則能念道癡慧一等無諸蔽礙衆生群萌  
等無愚議癡不可計思念意跡其心無念無  
有邊際愚冥無限由是回得志性無明何從

有起癡已不起闇冥何類如癡無處佛道亦  
介了無崖底諸法無二別聲平等等察癡響  
了空一等愚冥如雲分別平等則曉定意是  
爲菩薩等遊愚癡又告溥首何謂菩薩等意  
分別遊入不善欲行無形瞋行無處不行癡  
行知衆平等諸塵悉平得解虛無所有了淨  
如是是爲菩薩等意遊入於諸不善又告溥  
首何謂菩薩等意遊入諸善德本衆生修善  
心行若干諸行一行常了平等已知平等衆  
行如幻別聲一等則了語音是爲菩薩等遊  
衆德又告溥首何謂菩薩等意分別遊入有  
爲所有無有計不可量無量難計常曉平等



了無央數無行無像解脫等寂觀一切安是  
爲菩薩等遊有爲又告溥首何謂菩薩等意  
分別遊入無爲本淨法寂亦無合會無明假  
聲等察音聲無言無教皆了無爲衆著言聲  
等觀如是是爲菩薩等遊無爲又告溥首何  
謂菩薩等意分別遊于平等不處有爲不住  
無爲諸行平等如空無礙三界無本何求泥  
洹不出不入乃至大安度脫衆生解不若干  
法身如空不散不聚是爲菩薩等遊平等世  
尊說斯章句之頌順如應時不可思議九万  
九千菩薩得不起法忍七十二億百千天人  
皆發無上正真道意三百六十万比丘漏盡

意解六千比丘尼皆發無上正真道意二千  
二百清信士千八百清信女皆發無上正真  
道意尔時溥首童真白世尊曰唯願大聖演  
三昧号菩薩由斯而致至德諸根明了聞是  
三昧所因名号則當獲得一切法明靡不通  
達而悉降伏一切迷惑邪見之衆樂一文字

分別曉了一切諸文以一切文而了一文辯  
才之慧不可限量為諸群生講說經法分別  
曉了緣應法忍以一切行入於一相逮無量  
無限之義曉了識義四分別辯於是世尊告  
溥首童真諦聽善思念之今當為仁分別本  
末答曰甚善願樂欲聞佛言有三昧名離無



量垢假使菩薩逮得斯定普見一切諸色清  
淨佛告溥首有三昧名懷若干假使菩薩逮  
得斯定智慧光明覆蔽一切日月之明有三  
昧名成具光明假使菩薩逮得斯定威耀覆  
蔽帝釋梵王三界之具悉蒙安隱諸天光耀  
忍不復現有三昧名捨界假使菩薩逮得斯  
定處於衆會蠲除一切姪怒癡病有三昧名  
莫能當假使菩薩逮得斯定照明一切八方  
上下諸佛國土有三昧名諸法無所生假使  
菩薩逮得斯定摠攬諸佛經語訓典爲衆會  
分別敷演有三昧名念雷音假使菩薩逮斯  
定者言語音聲暢于梵天有三昧名曉了一

切應心所樂假使菩薩逮斯定者悅可衆生  
隨其所樂而今解脫有三昧名無會現悅精  
進假使菩薩逮斯定者現見無爲無有限數  
終始之惑所聞所見莫不通達有三昧名無  
念寶德樂於世界假使菩薩逮斯定者放諸  
神足施化衆生有三昧名諸音緣會假使菩  
薩逮斯定者覺諸言音以無數字了一文字  
以一文字說無數字有三昧名積衆善德假  
使菩薩逮斯定者分別罪福興顯平等多所  
悅可一切衆生便聞佛音法音衆音聲聞音  
緣覺音菩薩音度無極音彼有所說亦無音  
聲有三昧名起諸揔持爲一切王假使菩薩



逮得斯定分別一切無量摠持有三昧名淨  
諸辯才假使菩薩逮斯定者寂除一切音聲  
言說皆無言教亦無響應無言無教亦無所  
有於是溥首白世尊曰唯然大聖鄙身寧應  
講斯典之功德乎告曰宜講溥首白佛假使  
菩薩聞斯經典而不狐疑發心受持而諷誦  
讀其人現在得妙辯才聰明辯欣豫辯深妙  
辯無合會辯常行慈心加諸衆生無毀傷意  
所以者何設使憂念所作所趣奉行智諦隨  
身未曾捨離尔時世尊讚溥首曰善哉善哉  
快說此言誠如之意譬如布施獲致大富而  
不虛假持戒生天亦不虛假今斯經典亦復

如茲學致辯才亦不虛設悉得本志猶如日  
光出照天下衆冥悉除斯經如是諷誦學者  
懷來辯才靡不通達喻如菩薩坐于道場於  
佛樹下逮得無上正真之道成最正覺菩薩  
如是學誦斯經必得辯才除諸狐疑是故溥  
首假使菩薩現欲興辯曉練諸法聞斯經典  
心不猶豫即當受持講說諷誦爲諸衆會廣  
演其誼於是離垢截菩薩前白佛言佛滅度  
後其有受持諷誦講說斯經法者廣爲衆會  
敷演其誼鄙親當爲寡解所歸使不狐疑疾  
得辯才於時弊魔愁毒垂淚來詣佛所白世  
尊曰唯無建立於斯經也如來至真等正覺



常懷大哀其有苦患施以大安善哉大聖願除  
我感如管世尊初坐樹下處于道場今復重  
加說斯經典我今憂鬱心懷懊惱甚於如來  
始得佛道所投濟時我之反側不能自勝一  
切皆當得不退轉逮無上正真之道成最正  
覺其有黎庶耳聞斯經聽音伏名悉當得道  
至于滅度空我境界虛魔宮殿大聖撫育安  
住垂安興建大悲唯見矜濟佛告魔曰波旬  
莫恐勿懷怖懼一切衆生不悉滅度如來亦  
不建立斯經魔聞佛教踊躍歡喜善心生矣  
忽然不現溥首白佛何故爲魔而說斯教佛  
告溥首斯經典者住無所住是故爲魔而說

斯言吾不建立斯經典也至誠不虛一切諸  
法住無所住不可逮得無有言教離於二事  
本際平等審諦無本法界如稱平若虛空無  
適無莫真正無異今經流布斯閭淨提於此  
天下當有瑞應世尊適建誠諦之教自然空  
中音普廣聞誠如佛言至誠不虛佛告阿難  
受斯普門品經之要持諷誦讀宣示同學又  
言阿難八十万四千法品之藏計比斯經典  
等無差特所以者何無量之門法界諸要如  
來分別曉了衆生解斯經典而成佛道然後  
講說八万四千諸經品藏是故阿難當受斯  
經消息將順諦持諷誦為衆人說說此已離



垢藏菩薩溥首童真賢者阿難諸天世人捷  
沓和阿須倫聞經歡喜稽首而退

佛說普門品經

服

宴於見反

評訖音信問

溥首上音

媛古家反

惚上音

往作

也數初臭反

救許救

海淵玄下

烏反

惚上音

往作

反之象無

咽煙二

醜咸二

鹹咸二

柔軟下

下

字

鞞上應

音作

誼音義

福下

下

牒反病劣

浪音

未詳

義音

福下

下

也

相指下口

滿胞羊下

正作

脬反

底

可反

靡無也

蠲除上俱

攬反

鄙反

底

感倉唐反


濟上居

無適下音

親無的

謂無真

也



猪飼順良寄附



